

CONVENIO DE COLABORACIÓN ENTRE A CONSELLERÍA DE ECONOMÍA, INDUSTRIA E INNOVACIÓN E A CÁMARA OFICIAL MINEIRA DE GALICIA PARA A CREACIÓN DUN CATÁLOGO COS RECURSOS MINERAIS DISPOÑIBLES EN GALICIA

MEMORIA XUSTIFICATIVA

O director xeral de Planificación Enerxética e Recursos Naturais da Consellería de Economía, Industria e Innovación da Xunta de Galicia, **DECLARA:**

Que esta Consellería formalizou coa Cámara Oficial Mineira de Galicia (COMG) o convenio arriba referido, por un período de vixencia que abrangue desde a data da súa sinatura ata o 1 de decembro de 2023.

Que o instrumento convencional ten por obxecto:

Regular a colaboración entre a Consellería de Economía, Industria e Innovación e a Cámara Oficial Mineira de Galicia para o financiamento das actuacións necesarias para a elaboración dun catálogo dos recursos minerais presentes en Galicia, susceptibles de integrarse na Materioteca de Galicia. En concreto, as actuacións obxecto do convenio son as que se describen a continuación:

- a) Elaboración de fichas de produtos/subprodutos dos recursos de orixe mineral dispoñibles en Galicia: A COMG seleccionará 35 mostras en diferentes zonas de extracción mineira coa finalidade de elaborar as correspondentes fichas técnicas, as cales irán acompañadas da mostra física representativa da materia obxecto de catalogación.
- b) Clasificación estratéxica dos estériles con posible valor engadido: A COMG analizará as mostras de interese e clasificará os minerais con posible valor que se poidan presentar nestas explotacións.
- c) Inclusión dos datos do Catálogo de minerais na web da Materioteca: Recompilados e catalogados os datos dos minerais presentes na comunidade, procederase a poñelos ao servizo da sociedade por medio da súa inclusión na web da Materioteca, para o cal deberase programar unha base de datos que recolla os datos recompilados.
- d) Elaboración dun mapa de recursos dispoñibles no sector mineiro: Cos resultados obtidos nas actuacións anteriores, a COMG elaborará un mapa cos produtos do sector mineiro galego que servirá como ferramenta para dar a coñecer os recursos minerais existentes en Galicia.





e) Desenvolvemento dunha imaxe gráfica para o proxecto

f) Presentación colectiva dos datos obtidos a centros tecnolóxicos, empresas e grupos de investigación do proxecto de colaboración

Que existe converxencia de intereses entre as entidades asinantes en orden á consecución do obxecto referido.

Que o instrumento convencional que se pretende asinar se fundamenta no seguinte:

O artigo 48.1 da Lei 40/2015, do 1 de outubro, de réxime xurídico do sector público, establece que as Administracións Públicas, os seus organismos públicos e entidades de dereito público vinculados ou dependentes e as Universidades públicas, no ámbito das súas respectivas competencias, poden subscribir convenios con suxeitos de dereito público e privado, sen que iso poida supoñer cesión da titularidade da competencia, sinalando no seu apartado 3 que a subscrición de convenios deberá mellorar a eficiencia da xestión pública, facilitar a utilización conxunta de medios e servizos públicos, contribuír a realización de actividades de utilidade pública e cumprir coa lexislación de estabilidade orzamentaria e sustentabilidade financeira.

O Regulamento de réxime interior da Cámara Oficial Mineira de Galicia de 30 de marzo de 2016 indica no seu artigo 2, alínea primeira, que "a Cámara Oficial Mineira de Galicia é unha corporación de dereito público, sen ánimo de lucro, que se configura como órgano consultivo, de asesoramento e colaboración cos poderes públicos, especialmente coa Administración da Comunidade Autónoma de Galicia, sometido á tutela da consellería da Xunta de Galicia con competencia en minería. Para o cumprimento dos seus fins e exercicio das súas funcións goza de personalidade xurídica propia e plena capacidade de obrar. A súa estrutura e funcionamento deberán ser democráticos e suxeitarse ás disposicións do presente Regulamento."

Segundo o artigo 3 do citado Regulamento de réxime interior, a COMG "ten como finalidade a representación, fomento, promoción e defensa dos intereses xerais da industria mineira en Galicia, con especial atención á compatibilización coa protección do medio ambiente, a integración social e territorial, a innovación, a formación e a seguridade e saúde laboral das actividades mineiras, así como a prestación de servizos aos seus socios. Así mesmo, exercerá as competencias de carácter público que lle atribúe a lexislación relativa ás Cámaras Oficiais Mineiras e as que lles poidan ser asignadas polas Administracións Públicas de acordo cos instrumentos que establece o ordenamento xurídico".

As actuacións obxecto do convenio responden ao interese xeral e existen razóns de interese público, social e económico que xustifican, conforme ao artigo 19.4.c) e 26.2.a) da Lei 9/2007, do 13 de xuño, de subvencións de Galicia, a colaboración da Xunta de Galicia, a través da CEII, no financiamento das ditas actuacións.





A Consellería de Economía, Industria e Innovación achegará ata un máximo de **CEN MIL EUROS (100.000,00 €)**, con cargo á aplicación orzamentaria **05.03.734A-780.0**, dos orzamentos da Comunidade Autónoma de Galicia para o ano 2023.

Que os intereses converxentes das partes asinantes exclúen o ánimo de lucro, e non poden satisfacerse axeitadamente mediante a celebración dun contrato dos contemplados na Lei 9/2017, do 8 de novembro, de contratos do sector público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, do 26 de febreiro de 2014.

En atención ao exposto, e a fin de dar cumprimento ao preceptuado no artigo 15.2 da Lei 1/2016, do 18 de xaneiro, de transparencia e bo goberno, estímase xustificado o recurso á sinatura do instrumento convencional que se pretende, con exclusión doutras figuras.

Santiago de Compostela, na data indicada na sinatura dixital

O director xeral de Planificación Enerxética e Recursos Naturais

Pablo Fernández Vila

